



ЎЗБЕКИСТОН РЕСПУБЛИКАСИ
ОЛИЙ ВА ЎРТА МАХСУС ТАЪЛИМ ВАЗИРИНИНГ
БУЙРУҒИ

2021 йил “5” март

№ 120

Тошкент ш.

Яширин иқтисодиёт ва коррупцияга қарши курашиш ҳамда унинг олдини олиш бўйича 2020-2021 йилларга мўлжалланган “Йўл харитаси”да белгиланган вазифаларнинг ижросини таъминлаш тўғрисида

Ўзбекистон Республикаси Президенти Администрациясининг 2020 йил 4 сентябрдаги 02-2488-сонли топшириғига мувофиқ тасдиқланган “Ўзбекистон Республикаси Олий ва ўрта махсус таълим вазирлигида яширин иқтисодиёт ва коррупцияга қарши курашиш ҳамда унинг олдини олиш бўйича 2020-2021 йилларга мўлжалланган “Йўл харитаси”да белгиланган вазифаларни самарали ва ўз вақтида амалга ошириш, тизимда коррупцияга қарши курашиш маданиятини ошириш ҳамда коррупциявий ҳуқуқбузарликларга йўл қўймаслик ва бу борада самарали тизимни шакллантириш мақсадида

Б У Ю Р А М А Н:

1. Ўзбекистон Республикаси Олий ва ўрта махсус таълим вазирлигининг коррупцияга қарши курашиш сиёсати 1-иловага, Ўзбекистон Республикаси Олий ва ўрта махсус таълим вазирлиги марказий аппарати, ҳузуридаги ташкилотлар, олий ва ўрта махсус, профессионал таълим муассасалари билан ҳуқуқни муҳофаза қилиш органларининг ўзаро ҳамкорлиги тўғрисида тартиб 2-иловага, Ўзбекистон Республикаси Олий ва ўрта махсус таълим вазирлигининг коррупцион ва бошқа турдаги ҳуқуқбузарликлар бўйича хабар бериш тартиби тўғрисидаги низом 3-иловага мувофиқ тасдиқлансин.

2. Белгилансинки:

Мазкур буйруқ ва у билан тасдиқланган ҳужжатлар Олий ва ўрта махсус таълим вазирлиги тасарруфидаги олий таълим муассасалари, вазирлик ҳузуридаги ташкилотлар ҳамда касбий таълимни ривожлантириш ва мувофиқлаштириш ҳудудий бошқармалари учун мажбурий ҳисобланади;

Республика ҳудудида жойлашган хорижий олий таълим муассасалари ва уларнинг филиаллари, бошқа вазирлик ва идоралар тасарруфидаги олий таълим муассасалари ҳамда нодавлат олий таълим муассасаларига тавсиявий характерга эга;

Вазирликнинг барча бошқарма ва бўлимлари, ҳузуридаги ташкилотлар, вазирлик тизимидаги олий ва ўрта махсус, профессионал таълим муассасалари, шунингдек, касбий таълимни ривожлантириш ва мувофиқлаштириш ҳудудий бошқармаларига ишга қабул қилинаётган ҳар қандай шахс ушбу ҳужжатлар билан танишишга ва уларда белгиланган қоидаларга риоя қилишга мажбур.

3. Вазирлик тизимидаги олий таълим муассасалари ректор (директор)лари, ҳузуридаги ташкилотлар ҳамда касбий таълимни ривожлантириш ва мувофиқлаштириш ҳудудий бошқармалари бошлиқлари 2021 йил апрель ойи охирига қадар “Ўзбекистон Республикаси Олий ва ўрта махсус таълим вазирлигининг коррупцияга қарши курашиш сиёсати”, “Ўзбекистон Республикаси Олий ва ўрта махсус таълим вазирлиги марказий аппарати, ҳузуридаги ташкилотлар, олий ва ўрта махсус, профессионал таълим муассасалари билан ҳуқуқни муҳофаза қилиш органларининг ўзаро ҳамкорлиги тўғрисида тартиби” ҳамда “Ўзбекистон Республикаси Олий ва ўрта махсус таълим вазирлигининг коррупцион ва бошқа турдаги ҳуқуқбузарликлар бўйича хабар бериш тартиби тўғрисида низом”нинг мазмун-моҳияти ҳақида раҳбар-ҳодимлар, профессор-ўқитувчилар ҳамда талаба-ёшларга тушунтириш ишларини ташкил этсин.

4. Ташкилий-кадрлар бошқармаси (Б.Қодиров) Олий ва ўрта махсус таълим вазирлигининг коррупцияга қарши курашиш сиёсати талабларини бузган ҳамда ижроси бўйича сусткашликларга йўл қўйган ходимларга нисбатан қонунчиликда белгиланган тартибда интизомий жазо чоралари қўлланилиши юзасидан таклифлар киритиб борсин.

5. Олий таълимни ривожлантириш тадқиқотлари ва илғор технологияларни татбиқ этиш маркази (З.Ҳакимов) вазирликда яширин иқтисодиёт ва коррупцияга қарши курашиш ҳамда “комплаенс назорат” тизимини жорий этиш бўйича тасдиқланган “Йўл харитаси”да белгиланган вазибаларни бажарилиши юзасидан раҳбариятга ахборот киритиб борсин.


6. Вазирлик ахборот хизмати тизимдаги коррупцион ҳуқуқбузарликлар тўғрисида хабар беришга мўлжалланган “anticoredu” расмий телеграм боти ташкил этилганлиги тўғрисидаги маълумотларни кенг жамоатчиликка етказилишини таъминласин.

7. Мазкур буйруқ ижроси назоратини ўз зиммамда қолдираман.

Вазир



А. Тошқулов



Ўзбекистон Республикаси
Олий ва ўрта махсус таълим вазирлигининг
2021 йил “5” *май* даги
сонли буйруғига
1-илова

Ўзбекистон Республикаси Олий ва ўрта махсус таълим вазирлигининг коррупцияга қарши курашиш бўйича СИЁСАТИ

I. Умумий қоидалар

1.1. Ўзбекистон Республикаси Олий ва ўрта махсус таълим вазирлигининг коррупцияга қарши курашиш сиёсати (*бундан буён матнда Сиёсат деб юритилади*) вазирлик марказий аппарати, вазирлик ҳузуридаги марказлар, касбий таълимни ривожлантириш ва мувофиқлаштириш ҳудудий бошқармалари, олий ва ўрта махсус, профессионал таълим муассасалари раҳбар-ҳодимлари, профессор-ўқитувчилар, талаба-ёшлар ўртасида коррупцияга қарши курашиш маданияти даражасини ошириш мақсадида ишлаб чиқилган.

1.2. Сиёсат коррупцияга қарши курашиш бўйича халқаро ташкилотлар тавсиялари ва етакчи халқаро амалиёт асосида ISO 37001:2016 “Коррупцияга қарши курашиш менежменти тизимлари – фойдаланиш бўйича талаблар ва тавсиялар” халқаро стандарти талабларини инобатга олган ҳолда Ўзбекистон Республикасининг қонунчилиги талабларига мувофиқ ишлаб чиқилган.

1.3. Ушбу Сиёсат талаблари Ўзбекистон Республикаси Олий ва ўрта махсус таълим вазирлигининг таркибий тузилмалари, вазирлик тизимидаги олий ва ўрта махсус, профессионал таълим муассасалари учун мажбурий, бошқа вазирлик ва идоралар тизимига кирадиган олий ва ўрта махсус, профессионал таълим муассасаларига тавсиявий характерга эга.

1.4. Вазирлик марказий аппарати ва таркибий бўлинмаларида коррупцияга қарши курашишнинг асосий мақсадлари қуйидагилар ҳисобланади:

вазирликнинг барча бошқарма ва бўлимлари, вазирлик ҳузуридаги ташкилотлар, касбий таълимни ривожлантириш ва мувофиқлаштириш ҳудудий бошқармалари, олий ва ўрта махсус, профессионал таълим муассасалари (*бундан буён матнда вазирлик таркибий тузилмалари деб юритилади*) фаолиятининг барча соҳаларида коррупцияни олдини олиш бўйича чора-тадбирларни амалга ошириш;

олий ва ўрта махсус, профессионал таълим муассасалари раҳбар-ҳодимлари, профессор-ўқитувчилар, талаба-ёшларнинг ҳуқуқий онги ва ҳуқуқий маданиятини ошириш, коррупцияга нисбатан тоқатсиз муносабатни шакллантириш;

коррупциявий ҳуқуқбузарликларни ўз вақтида аниқлаш, уларга барҳам бериш, уларнинг оқибатлари, уларга олиб келувчи сабаблар ва шарт-

шароитларни бартараф этиш, коррупциявий ҳуқуқбузарликлар содир этилган тақдирда жавобгарликни таъминлаш;

вазирлик ва унинг таркибий тузилмаларида коррупцияни тубдан йўқотишга эришиш;

1.5. Сиёсат вазирликнинг локал ҳужжати сифатида юқорида кўрсатилган асосий мақсадларга эришиш учун вазирлик ва таркибий тузилмаларида коррупция билан боғлиқ ҳуқуқбузарликларни профилактика қилиш ва уларга барҳам беришга қаратилган асосий талаблар ва тамойилларни белгилаб берувчи асос ҳисобланади.

1.6. Мазкур Сиёсатнинг талаблари эгаллаб турган лавозими ва бажарадиган вазифа ва функцияларидан қатъий назар вазирлик ва таркибий тузилмалар билан меҳнат муносабатларида бўлган барча ходимларга нисбатан татбиқ этилади.

1.7. Вазирлик ва таркибий тузилмаларга ишга қабул қилинаётган ҳар қандай шахс ушбу Сиёсат билан имзо қўйган ҳолда танишишга ва унинг қоидаларига риоя қилишга мажбур.

1.8. Ушбу Сиёсатда куйидаги асосий тушунчалар ва атамалар қўлланилади:

коррупция – шахснинг ўз мансаб ёки хизмат мавқеидан шахсий манфаатларини ёхуд ўзга шахсларнинг манфаатларини кўзлаб моддий ёки номоддий наф олиш мақсадида қонунга хилоф равишда фойдаланиши, шунингдек, бундай нафни қонунга хилоф равишда тақдим этиш;

коррупцияга оид ҳуқуқбузарлик – коррупция аломатларига эга бўлган, содир этилганлиги учун қонун ҳужжатларида жавобгарлик назарда тутилган қилмиш;

манфаатлар тўқнашуви – вазирлик ва унинг таркибий тузилмалари ходимларининг шахсий (бевосита ёки билвосита) манфаатдорлиги унинг хизмат мажбуриятларини лозим даражада бажаришига таъсир кўрсатаётган ёхуд таъсир кўрсатиши мумкин бўлган вазият;

коррупциявий ҳаракатлар – ходим томонидан пора берувчининг манфаатларини кўзлаб ҳаракат ёки ҳаракатсизлиги учун бевосита ёки билвосита, шахсан ёки учинчи шахслар орқали порани яъни пул, қимматбаҳо қоғозлар, бошқа мол-мулкни, мулкий тусдаги хизматларни, бошқа мулкий ҳуқуқларни олиш, талаб қилиш, таклиф қилиш, ваъда қилиш ва бериш, шунингдек, пора бериш ва (ёки) олишда воситачилик қилиш, расмиятчиликларни соддалаштириш учун тўловларни олиш, ходим томонидан пора олиш ёки ҳуқуққа хилоф бошқа мақсадларда ўз хизмат мавқеидан ноқонуний фойдаланиш;

ходим – вазирлик ва таркибий тузилмалари билан меҳнат муносабатларига киришган шахс;

яқин қариндошлар – ота-она, туғишган ва ўғай ака-укалар ва опа-сингиллар, эр (хотин), фарзандлар, шу жумладан фарзандликка олинганлар, боболар, бувилар, неваралар, шунингдек эрнинг (хотиннинг) ота-онаси.

II. Коррупцияга қарши курашишнинг асосий тамойиллари

2.1. Вазирлик ва таркибий тузилмалари коррупцияга қарши курашиш тизимини қуйидаги принципларга асосланиб амалга оширади:

қонунийлик – вазирлик ва таркибий тузилмаларида коррупцияга қарши курашиш бўйича чора-тадбирлар Ўзбекистон Республикаси қонунчилиги талаблари, давлат бошқаруви органларида коррупцияга қарши курашиш бўйича жаҳонда тан олинган амалиётни ҳисобга олган ҳолда ҳамда вазирлик тизимининг белгиланган локал ҳужжатларига мувофиқ амалга оширилади;

коррупцияга тоқатсизлик – вазирлик ва унинг таркибий тузилмалари ўз фаолиятининг барча соҳаларида коррупциянинг ҳар қандай шакллари ва кўринишларига мурасасиз муносабатда бўлади. Шунингдек, ходимларга коррупциявий хавф-хатар келиб чиқиши мумкин бўлган фаолиятда бевосита ёки билвосита иштирок этиш тақиқланади;

очиқлик ва шаффофлик – вазирлик тизимида коррупцияга қарши курашиш соҳасида қабул қилинган ва амалга оширилаётган чора-тадбирлар ҳақида ходимларни ҳамда кенг жамоатчиликни хабардор қилади;

коррупция билан боғлиқ ҳуқуқбузарликлар учун жавобгарликнинг муқаррарлиги – коррупция билан боғлиқ ҳуқуқбузарликларни содир этган вазирлик таркибий тузилмалари ходимлари ўзининг мақоми ва эгаллаб турган лавозимидан қатъий назар вазирликнинг локал ҳужжатлари ва амалдаги қонунчиликка мувофиқ жавобгарликка тортилади;

рахбариятга тўғридан-тўғри мурожаат қилиш – вазирлик таркибий тузилмаларининг ҳар бир ходими коррупциявий ҳуқуқбузарликлар содир этилганлиги тўғрисида ишончли ва асосли маълумотлар мавжуд бўлганда белгиланган чораларни кўриш учун тўсқинликсиз Олий ва ўрта махсус таълим вазирига ва вазир ўринбосарларига мурожаат қилиши мумкин;

коррупцияга қарши курашиш тизимини доимий равишда такомиллаштириш – коррупцияга қарши курашиш тизимини мониторинг ва назорат қилиш ҳамда коррупциявий хавф-хатарларни олдини олиш борасида вазирлик таркибий тузилмалари тизимда коррупцияга қарши курашишнинг самарадорлигини тўхтовсиз равишда ошириш чораларини кўради.

III. Коррупцияга қарши курашиш тизимнинг элементлари

3.1. “Коррупцияга тоқатсизлик принципига таянган ҳолда вазирлик таркибий тузилмалари ходимларига коррупция билан боғлиқ ҳар қандай хатти-ҳаракатларда иштирок этиши, яъни пора берувчининг манфаатларини кўзлаб ҳаракат қилиши ёки ҳаракатсизлиги учун бевосита ёки билвосита, шахсан ёки учинчи шахслар орқали пора, яъни пуллар, қимматбаҳо қоғозлар, бошқа мол-мулк, мулкий тусдаги хизматларни беришни талаб қилиш, товламачилик қилиш, ваъда бериш ва пора бериш, пора бериш ва (ёки) олишда воситачилик қилиш, расмиятчиликларни соддалаштириш учун тўловларни олиш, шахс томонидан пора олиш ёки ғайриқонуний бошқа мақсадларда ўз хизмат мавқеидан ноқонуний фойдаланиши қатъиян тақиқланади.

3.2. Қуйидагилар вазирликнинг таркибий тузилмаларида коррупцияга қарши курашиш тизимининг асосий элементлари ҳисобланади:

а) коррупцияга қарши курашиш бўйича асосий ички ҳужжатларни Сиёсат ва Одоб-ахлоқ қоидалари ташкил этади.

б) Юқори даражада раҳбарлик намунаси:

вазирлик таркибий тузилмалари раҳбарлари ўзига бўйсунувчилар, фуқаролар ва юридик шахслар билан муносабатларда ҳалол, адолатли ва мустақил хулқ-атвор намунаси бўлишлари керак.

в) вазирлик таркибий тузилмалари раҳбарлари коррупцияга қарши курашиш самарали тизимни яратиш ва амалга оширишда қуйидагилар орқали етакчиликни намоёиш этади:

вазирлик таркибий тузилмалари фаолиятининг хавф-хатарга эга функциялари (йўналишлари)га коррупцияга қарши курашиш самарали чора-тадбирлар ва тартибларини жорий этади, шу жумладан, коррупцияга қарши курашиш дастури йўл харитасини ишлаб чиқади ва унинг ижросини назорат қилиш орқали кўмаклашади;

ўз мансаб мажбуриятларини бажариш доирасида қолган ходимларида коррупциянинг барча шакллари ва кўринишларига муросасиз муносабатни шакллантирган ҳолда коррупцияга қарши курашиш бўйича қонунчилик нормалари ва қабул қилинган ички ҳужжатларга риоя қилади ҳамда ахлоқий хулқ-атвор юзасидан шахсан намуна сифатида намоён бўлади.

г) коррупциявий хавф-хатарни аниқлаш ва баҳолаш:

вазирлик таркибий тузилмалари функцияларининг хусусияти, ташкилий тузилмаси, жамият ва бошқа шахслар билан ўзаро фаолият олиб боришига ҳамда бошқа ички ва ташқи омилларга боғлиқ ҳолда ўз фаолиятига хос бўлган коррупциявий хавф-хатарларни аниқлайди ва баҳолайди;

коррупциявий хавф-хатарни аниқлаш ва баҳолаш доирасида вазирликнинг таркибий тузилмалари фаолиятининг барча соҳалари коррупциявий хавф-хатарига кўпроқ учрайдиган функцияларни аниқлаш мақсадида таҳлил қилинади, уларда мавжуд бўлган коррупцияга қарши курашишни назорат қилишнинг барча шакллари ва тартиб-таомиллари аниқланган хавф-хатарларни камайтириш учун етарлилиги жиҳатидан таҳлил қилинади. Хавф-хатарларни аниқлаш ва баҳолаш жараёнида Вазирлик Ишчи гуруҳи, коррупцияга қарши курашишни мувофиқлаштирувчи бўлим ҳамда шахслар иштирок этади;

коррупциявий хавф-хатарларни баҳолаш йилига камида бир марта амалга оширилади. Коррупциявий хавф-хатарларни баҳолаш натижалари вазир ва вазир ўринбосарлари, таркибий тузилмалар раҳбарлари томонидан кўриб чиқилади, шунингдек, аниқланган хавф-хатарларни камайтирувчи коррупцияга қарши курашиш чора-тадбирлар ва тартиб-таомиллар вазирликнинг коррупцияга қарши курашиш дастурларида акс эттирилади.

д) мониторинг, назорат ва ҳисобот:

Вазирлик Ишчи гуруҳи тизимда коррупцияга қарши курашиш, амалга оширилган чора-тадбирларнинг етарлилиги, мутаносиблиги ва самарадорлигини баҳолайди ҳамда доимий мониторингини олиб боради.

Ўтказилган мониторинг натижалари бўйича вазирлик таркибий тузилмаларида коррупцияга қарши курашиш тизимини такомиллаштириш юзасидан тегишли чораларни кўради.

Вазирлик таркибий тузилмаларида мониторинг ва назорат қилишнинг қуйидаги тартиб-таомиллари амалга оширилади:

тасдиқланган режага мувофиқ, самарасиз назорат ва тартиб-таомилларни аниқлаш учун уларни тўғрилаш ва коррупцияга қарши курашиш тизимининг ишончлилиги ва самарадорлигини таъминлаш мақсадида танлов асосида вазирлик тизимидаги функциялар ва ички жараёнларни мониторинг қилади;

ички ва (ёки) ташқи текширувларни ўтказиш жараёнида ходимлар томонидан коррупцияга қарши курашиш бўйича талабларга риоя қилинишини назорат қилади;

коррупцияга қарши курашиш бўлими бошқа таркибий тузилмаларга юклатилган коррупцияга қарши чора-тадбирларнинг ўз вақтида ва тегишли тартибда амалга оширилиши устидан назорат олиб боради ва ҳ.к.

Коррупцияга қарши курашиш тизимини назорат қилиш ва мониторинги бўйича чора-тадбирлар натижалари вазирлик таркибий тузилмалари раҳбарларининг ҳисоботларида ўз аксини топади.

е) ҳуқуқбузарликларга нисбатан муносабат билдириш ва айбдор шахсларни жавобгарликка тортиш:

мазкур Сиёсатга амал қилиш ва вазирлик таркибий тузилмаларида коррупцияга қарши курашиш чора-тадбирларга риоя қилиш ҳар бир ходим учун ўз хизмат мажбуриятларини бажарилиши доирасида мажбурийдир. Ходимлар белгиланган талаб ва тартиб-таомилларнинг бузганлиги учун шахсан жавобгар ҳисобланади. Бундан ташқари, бевосита раҳбарлар ўз бўйсунувидаги ходимлар томонидан коррупцияга оид ҳуқуқбузарликларни содир этилганлиги учун шахсан жавобгар ҳисобланади;

коррупцияга қарши курашишга оид белгиланган талаблар ва тамойилларни бузган ходимлар Ўзбекистон Республикаси қонунчилигида белгиланган тартибда ва асосларда интизомий, маъмурий ёки жиноий жавобгарликка тортилади;

ходимлар уларни коррупция билан боғлиқ ҳуқуқбузарликни содир этишга ундовчи шахсларнинг ҳар қандай мурожаатлари тўғрисида, шунингдек, бошқа ходимлар томонидан содир этилган коррупцияга оид ҳуқуқбузарликлар ҳақида ўзига маълум бўлган ҳар қандай фактлар ҳақида ўз раҳбарларига ва коррупцияга қарши курашиш ваколатига эга бўлган вазирликнинг масъул бўлимига хабар беришлари шарт;

коррупцияга тоқатсизлик принципини ҳисобга олган ҳолда, вазирлик таркибий тузилмаларида ходимларнинг коррупцияга оид ҳуқуқбузарлик содир этишлари билан боғлиқ ҳар қандай асосли шубҳа бўйича хизмат текширувлари Ўзбекистон Республикаси қонунчилиги талабларига мувофиқ ва ички ҳужжатларда белгиланган тартибда ўтказилади. Коррупцияга қарши курашиш тўғрисидаги қонун ҳужжатлари нормаларини ва (ёки) мазкур сиёсат ва бошқа ички ҳужжатларида белгиланган коррупцияга қарши талаб

ва тартиб-таомилларни ходимлар, уларнинг лавозими, хизмат муддати ва бошқа омиллардан қатъи назар Ўзбекистон Республикаси қонунчилигида ҳамда вазирликнинг локал ҳужжатларида назарда тутилган доирада ва асосларда жавобгарликка тортилади;

коррупцияга оид ҳуқуқбузарлик аниқланган тақдирда вазирликнинг масъул бўлими уларнинг содир этилиш сабаблари ва шарт-шароитларини таҳлил қиладилар ва доимий асосда коррупцияга қарши курашиш тизимини такомиллаштиради;

вазирлик коррупцияга оид ҳуқуқбузарликларни аниқлаш ва текшириш учун бошқа ҳуқуқни муҳофаза қилувчи органлар ва давлат органлари билан ҳамкорлик қилади;

амалга ошириладиган тадбирлар, шунингдек, коррупцияга қарши курашиш бўйича назорат чоралари ва тартиб-таомиллар коррупцияга қарши курашиш бўйича дастур/режа/йўл харитасида акс эттирилади ҳамда тегишли ички ҳужжатларда белгиланади;

ё) ахборотлаштириш, коммуникация ва маслаҳат бериш:

коррупциявий хавф-хатарларни камайтириш ва вазирлик таркибий тузилмаларида коррупцияга қарши курашиш тамойиллари ва талаблари ҳақида жамиятнинг хабардорлигини ошириш мақсадида, мазкур Сиёсат ва коррупцияга қарши курашиш бўйича амалга ошириладиган чора-тадбирлари тўғрисидаги асосий маълумотлар уларнинг расмий веб-сайтларига жойлаштирилади;

вазирлик таркибий тузилмаларида ишлайдиган ходимларини йилига камида бир марта коррупцияга қарши курашиш асослари бўйича доимий ва тизимли ўқитилади, шу жумладан, ишга янги қабул қилинаётган ходимларни ушбу Сиёсат ва коррупцияга қарши курашиш бўйича бошқа ички ҳужжатлар билан мажбурий тартибда таништирилади;

вазирлик таркибий тузилмаларида ишлайдиган ходимлари ва фуқароларнинг коррупцияга муросасиз муносабатини шакллантириш бўйича ва коррупцияга қарши курашиш бўйича амалга оширилган чора-тадбирлар тўғрисида хабардорлигини оширишга қаратилган тематик аудио ва видеороликлар ҳамда бошқа ахборот маълумотларидан фойдаланган ҳолда коррупцияга қарши курашиш тадбирлар ўтказилади;

вазирлик таркибий тузилмалари ходимлари томонидан коррупцияга оид ҳуқуқбузарликлар содир этилганлиги гумонлар ёки фактлар, коррупциявий хавф-хатарлар ва бошқалар (мазкур Сиёсатнинг 6-бобида назарда тутилган) ҳақида хабар берилиши мумкин бўлган алоқа каналлари билан таъминланади;

вазирлик таркибий тузилмалари ходимларининг меҳнат шартномаларига коррупцияга қарши курашиш қоидаларини киритади;

тасдиқланган режага мувофиқ, коррупцияга қарши курашиш бўйича масъул шахс томонидан коррупцияга қарши курашиш хулқ-атвор юзасидан ташвиқотлар ўтказилади.

IV. Коррупцияга қарши курашиш учун масъул шахслар ва бўлимлар

4.1. Вазирлик таркибий тузилмаларида коррупцияга қарши курашиш бўйича самарали тизимни йўлга қўйиш мақсадида масъул бўлим ташкил этилган бўлиб, бўлим таркиби штат жадвалига асосан 3 нафар ходим (бўлим бошлиғи, 1 нафар бош мутахассис ва 1 нафар етакчи мутахассис)дан иборат¹.

Бўлим:

тизимда коррупцияга қарши курашиш бўйича вазифаларни амалга оширишда етарли даражада мустақилликка ва муҳим ресурсларга эга бўлиб, бевосита Олий ва ўрта махсус таълим вазирлигига бўйсунди ва ўз фаолиятини ўз Низомига мувофиқ амалга оширади;

вазирлик таркибий тузилмаларида коррупцияга қарши курашишга оид қонунлар, миллий Кенгаш қарорлари ва бошқа меъёрий ҳужжатлар, шунингдек, вазирлик Ҳайъати қарорлари ва буйруқларига риоя этилиши устидан назорат олиб боради;

вазирлик таркибий тузилмаларида коррупцияга оид ҳуқуқбузарликларнинг олдини олишга қаратилган ички стратегия – йўл хариталари, чора-тадбирлар ва иш режаларини ишлаб чиқади, уларнинг тўлиқ, сифатли ва ўз вақтида ижро этилишини таъминлайди, белгиланган чора-тадбирларнинг амалга оширилиши аҳволини ўрганади, натижалари бўйича маълумотлар тайёрлайди ва раҳбариятга тақдим этади;

вазирлик таркибий тузилмаларида коррупцияга қарши курашишни такомиллаштиради ва “Коррупциясиз соҳа” лойиҳасини амалга оширади;

ўзининг ваколати доирасида тизимда коррупцияга қарши курашиш борасида фаолият юритиб, маҳаллийчилик ва қариндош-уруғчиликка, мансаб ваколатларини суиистеъмол қилишлик, ўзганинг мулкани йўқотилишига олиб келадиган ҳолатларга йўл қўймаслик чораларини ишлаб чиқади;

олий таълим муассасаларида коррупцияга қарши курашиш ишларини ташкил этиш, профессор-ўқитувчилар ва талаба-ёшлар ўртасида ҳуқуқий саводхонликни оширишга қаратилган конференциялар, учрашувлар, семинарлар, танловлар, сўровлар ташкил этади;

вазирлик таркибий тузилмаларида коррупцияга қарши курашиш бўйича соҳага оид илғор хорижий тажрибаларни ўрганади ва таҳлил қилади;

вазирлик таркибий тузилмаларида коррупцияга мойил бўлган соҳаларни аниқлаш асосида факультет ва кафедралар, бўлимлар кесимида коррупцияга оид хариталарни тузади, коррупцияга оид ҳуқуқбузарликлар содир этилишининг шарт-шароитлари ва сабабларини ўрганади, шунингдек, уларни бартараф этиш юзасидан таклифлар ишлаб чиқади;

¹ *Изоҳ:* Вазирликнинг 2020 йил 26 октябрдаги 558-сон буйруғига асосан вазирлик марказий аппаратида ва таркибий тузилмаларида қарши курашиш “Комплаенс-назорат” тизимини жорий этиш ва мувофиқлаштиришга Олий таълимни ривожлантириш тадқиқотлари ва илғор технологияларни татбиқ этиш марказининг Назорат-ҳуқуқий бўлими масъул этиб белгиланган. Коррупцияга қарши курашиш “Комплаенс-назорат” хизматини мувофиқлаштириш вазифаси бошқа бўлимга юклатилса мазкур сиёсатнинг IV бобида белгиланган вазифалар янги бўлим томонидан амалга оширилади.

олий ва ўрта махсус, профессионал таълим муассасалари томонидан коррупцияга қарши курашиш тўғрисидаги қонунчиликда белгиланган чекловлар, тақиқлар ва лавозим мажбуриятларига риоя этилишини таъминлаш бўйича раҳбарларнинг масъулиятини ошириш, уларнинг лавозим мажбуриятига педагог ва талабалар ўртасида коррупция билан боғлиқ ҳуқуқбузарликларнинг олдини олиш, уларни содир этилишига сабаб ва шароитларни аниқлайди ва бартараф этиш мажбуриятларини киритади;

олий ва ўрта махсус, профессионал таълим муассасаларининг ўқув дастурларига коррупцияга қарши курашиш махсус курсларини киритиш, коррупцияга қарши курашиш мавзусида ўқув дастурларини жорий этиш ҳамда коррупцияга қарши курашиш бўйича қисқа муддатли ўқув курсларини ташкил этиш чораларини кўради;

олий ва ўрта махсус, профессионал таълим муассасаларида коррупцияга қарши курашиш соҳасида норматив ва ташкилий-амалий базани такомиллаштириш чораларини кўради;

олий ва ўрта махсус, профессионал таълим муассасаларида коррупцияга оид ҳуқуқбузарликларни барвақт аниқлаш ва ўз вақтида бартараф этиш мақсадида, фуқаролик жамияти институтлари, ҳуқуқни муҳофаза қилувчи ва назорат қилувчи органлар ва ота-оналар билан коррупцияга қарши курашиш соҳасида самарали ҳамкорликни йўлга қўяди;

“Жамоатчилик назорати тўғрисида”, “Коррупцияга қарши курашиш тўғрисида”ги Ўзбекистон Республикаси қонунлари доирасида олий таълим муассасалари томонидан коррупцияга қарши курашиш борасида амалга оширилаётган ишлар юзасидан таълим муассасаси раҳбарияти, педагог ва талабалар эшитувларини ташкил этади;

олий ва ўрта махсус, профессионал таълим муассасалари коррупция билан боғлиқ ҳуқуқбузарликларга қарши курашишга масъул шахсларни ушбу соҳада ўқитиш ва малакасини ошириш юзасидан ўқув-методик дастурлари ишлаб чиқади ва амалга ошириш ҳамда уларни коррупцияга оид ҳуқуқбузарликлар профилактикасига қаратилган ўқув-услубий ва тарғибот материаллари, тарбиявий ва техник воситалар билан таъминлайди;

вазирлик таркибий тузилмаларида коррупцияга йўл қўймаслик юзасидан амалга оширилган ишлар мониторингини юритади.

V. Коррупцияга қарши курашишнинг асосий йўналишлари

§ 1. Ходимларни танлаш, лавозимдан лавозимга ўтказиш, моддий рағбатлантириш

5.1.1. Вазирлик таркибий тузилмалари ходимларини танлаш, уларни аттестациядан ўтказиш ва фаолиятини баҳолаш, шу жумладан мукофот пулларини тўлаш, устама ҳақлар ва бошқа турдаги мукофотларни белгилаш жараёни барча ходимлар учун шаффоф, тенг ва холис бўлиб, ушбу Сиёсатнинг асосий тамойиллари ва талабларига мувофиқ келади.

5.1.2. Вазирлик таркибий тузилмалари раҳбарлари, бошқарма ва бўлим бошлиқларини мукофотлашга асос бўлиб хизмат қиладиган, улар фаолиятининг асосий кўрсаткичларини баҳолаш тартиби ва мезонлари ишлаб

чиқилган бўлиши лозим. Ушбу кўрсаткичлар холис, ошкора ҳамда бошқа ходимлар томонидан кўриб чиқилиши мумкин.

§ 2. Виждонлилик ва ҳалоллик тамойилларига амал қилиш

5.2.1. Вазирлик тузилмалари ходимлари ўз хизмат мажбуриятларини бажариш чоғида виждонлилик ва ҳалоллик тамойилларига амал қилиши, шахсий манфаатларини ҳисобга олган ҳолда ўзларининг хизмат мавқеидан фойдаланмаслик ва манфаатлар тўқнашувига олиб келадиган вазиятлардан сақланишлари лозим.

5.2.2. Вазирлик таркибий тузилмаларининг ходимлари ишга қабул қилинишида, бошқа лавозимга ўтказилишида манфаатлар тўқнашувига олиб келадиган ёки олиб келиши мумкин бўлган шахсий манфаатдорлиги ҳақидаги маълумотларни ҳар йили ва тегишли вазиятлар/ҳолатлар юзага келишига қараб ошкор қилишга мажбурдир.

§ 3. Иш жараёнида совғалар

5.3.1. Вазирлик таркибий тузилмалари ходимларига ўз хизмат мажбуриятларини бажариш билан боғлиқ ҳолда жисмоний ва юридик шахслардан бирон-бир совға ёки иш жараёнида меҳмондўстликнинг белгилари, қарз, кафолатлар, кафилликлар, мукофотлар шаклида рағбатлантириш воситаларини, нақд пул маблағлари ёки уларнинг эквиваленти, қимматли қоғозлар кўринишида моддий ёрдам қабул қилиш таъқиқланади.

5.3.2. Вазирлик таркибий тузилмалари ходимлари томонидан расмий делегациялар таркибида, расмий тадбирларда, жумладан, хорижда олинган ҳар қандай совғалар суммасидан қатъий назар вазирлик тасарруфига ўтказилади.

5.3.3. Вазирлик таркибий тузилмалари ходимларига уларнинг шахси билан боғлиқ байрамлар (туғилган кун, боланинг туғилиши, Ватан ҳимоячилари куни, хотин-қизлар куни)да берилган, хизмат мажбуриятларини бажариши билан боғлиқ бўлмаган совғалар ходимнинг шахси билан боғлиқ совғалар деб, тан олинади.

5.3.4. Бундай совғаларни беришда қуйидаги талабларга риоя қилиш лозим: совғалар вазирлик, таркибий тузилмаларининг камида уч нафар ходимлари иштирокида берилиши;

совға бериш жараёни табрик нутқи билан бирга бўлиши, унда совға беришга сабаб бўлган воқеа ўзининг аниқ ифодасини топган бўлиши;

совғанинг умумий қиймати (барча солиқлар ва йиғимларни ҳисобга олган ҳолда) 5 (беш) баравар базавий ҳисоблаш миқдоридан ошмаслиги;

5.3.5. Вазирлик номидан халқаро конференцияларда, симпозиумларда ва бошқа ишбилармонлик (хизматга оид) йиғилишларда совғалар бериш вазир ёки унинг ўринбосарлари буйруғи билан амалга оширилади.

4-§. Учинчи шахслар билан ўзаро муносабатлар

5.4.1. Вазирлик ва таркибий тузилмалари ушбу Сиёсатнинг тамойиллари

ва талабларига зид бўлган ҳар қандай тўловлар ва (ёки) шу каби коррупциявий хавф-хатарларни келтириб чиқарувчи хатти-ҳаракатларни амалга ошириш учун маҳсулот етказиб берувчиларни, пудратчиларни ва бошқа учинчи томонларни жалб қилмайди.

5.4.2. Вазирлик ва таркибий тузилмалари учинчи шахслар билан муносабатларда ўз фаолиятини амалга оширишида қонунийлик ва шаффофлик тамойилларига амал қилади.

§ 5. Хайрия ва ҳомийлик фаолияти

Вазирлик ва таркибий тузилмалари қонунда назарда тутилган ҳолларда хайрия ва ҳомийликни қабул қилишлари мумкин. Бундай ёрдамни олган пайтда манфаатлар тўқнашувига йўл қўймаслик, маблағларни қонунда ва (ёки) шартномада белгиланган мақсадлар учун самарали сарфланишини таъминлаш, шунингдек, Интернет тармоғидаги ўзининг расмий веб-сайтларида имкон қадар барча чораларни кўришлари мумкин.

§ 6. Вазирлик ва унинг таркибий тузилмалари фаолиятини видеотасвирга олиш ва трансляция қилиш

5.6.1. Вазирлик ва таркибий тузилмалари ходимларининг фаолиятини назорат қилиш учун хизмат хоналарида видео ва аудио ёзув камералари жойлаштирилади, уларнинг ёзувлари вазирликнинг масъул ходимлари томонидан доимий равишда кузатиб борилади.

5.6.2. Вазирлик таркибий тузилмаларининг расмий веб-сайтларига коррупция хавфи юқори бўлган айрим жараёнларнинг онлайн трансляциялари жойлаштирилади (хусусан, ходимлар билан суҳбат ўтказиш ва уларни синовдан ўтказиш, комиссия йиғилишлари ва бошқалар).

§ 7. Ички ҳужжатларни коррупцияга қарши экспертизаси

Ички ҳужжатларни ҳуқуқий экспертизадан ўтказишда ҳужжатларда коррупциявий ҳуқуқбузарликлар содир этилишига имкон яратадиган коррупциявий омиллар келиб чиқишини олдини олиш, аниқлаш ва истисно қилиш мақсадида ҳам экспертиза ўтказилади.

§ 8. Вазирлик таркибий тузилмалари ходимларига маслаҳат бериш

Вазирлик таркибий тузилмалари ходимларида коррупцияга қарши амалдаги қонун ҳужжатлари талаблари, ушбу Сиёсат қоидалари ёки вазирликнинг коррупцияга қарши бошқа чора-тадбирлар ва тартиб-таомиллар билан боғлиқ бўлган ҳар қандай саволлар бўлса, улар ўзларининг таркибий бўлинмаси Олий ва ўрта махсус таълим вазирлигининг коррупцияга қарши курашиш ва “комплаенс назорат” хизматига масъул бўлимига ҳамда вазирлик (1006) ишонч телефониغا мурожаат қилишлари мумкин.

VI. Коррупциявий ҳуқуқбузарликлар тўғрисида хабар бериш

6.1. Вазирлик таркибий тузилмалари ходимлари ва бошқа шахслар, агар улар тизим ходимлари хатти-ҳаракатларининг қонунийлиги ва (ёки) одоб-ахлоққа мувофиқлиги тўғрисида шубҳа туғилса, коррупция ва бошқа ҳуқуқбузарлик ҳолатлари содир этилишига гумон ёки содир этилганлиги фактлари бўлса, улар бу ҳақда вазирликнинг фойдаланиш мумкин бўлган алоқа каналлари орқали хабар беришлари мумкин.

6.2. Вазирлик таркибий тузилмалари ўз ваколатлари ва мавжуд имкониятлари доирасида ҳуқуқбузарлик тўғрисида ишончли маълумот берган шахснинг махфийлигини таъминлайди (қонунчиликда назарда тутилган ҳоллар бундан мустасно).

6.3. Вазирлик таркибий тузилмалари ўз ходимларининг манфаатларини ҳимоя қилади ва қасос олишга қаратилган ҳаракатларга, шу жумладан ишдан бўшатиш, лавозимни пасайтириш, камситиш, босим ўтказиш, вазирлик тизимининг бошқа ходимларининг шубҳали ҳаракатлари ёки улар томонидан ушбу Сиёсатнинг коррупцияга қарши талабларини бузиш эҳтимоли ҳақида хабар берган шахсларни таъкиб қилинишига йўл қўймаслигини кафолатлайди.

6.4. Коррупцияга оид ҳуқуқбузарликлар тўғрисидаги хабарларни қуйидаги алоқа каналлари орқали бериш мумкин:

1003, 71 207-03-41, 71 246-38-57 телефон рақамлари ва вазирлик томонидан ўрнатилган бошқа телефон рақамлар;

@*anticoredu* расмий телеграм боти;

вазирлик таркибий тузилмаларининг расмий веб-сайтларида жойлаштирилган шакллар;

электрон почта манзиллари;

тўғридан-тўғри ҳуқуқни муҳофаза қилиш органлари.

6.5. Вазирлик таркибий тузилмалари алоқа каналларига келиб тушган барча хабарлар Ўзбекистон Республикаси қонунчилигива вазирликнинг ички ҳужжатларига мувофиқ, вазирликнинг масъул бўлими ёки ходими томонидан ҳолис тарзда ва ўз вақтида кўриб чиқилади.

6.6. Аноним равишда (фақат телеграм каналлари орқали) юборилган хабарлар ҳам кўриб чиқиш учун қабул қилинади.

6.7. Вазирлик таркибий тузилмалари томонидан келиб тушган хабарга жавоб бериш учун мурожаат этувчи шахс билан қуйидаги ҳолатларда боғланилмайди:

тўлиқ ва кенг қамровли текшириш ўтказиш учун зарур бўлган қўшимча маълумотларнинг йўқлиги;

вазирлик таркибий тузилмалари ходимининг қасддан ёлғон маълумотни тақдим этиши ушбу Сиёсатни бузилиши ва ахлоқсиз ҳуқ-атворнинг намунаси сифатида қаралса, бундай шахс эса Ўзбекистон Республикаси қонунчилигига ва вазирликнинг ички ҳужжатларига мувофиқ, жавобгарликка тортилиши мумкин.

6.8. Вазирлик таркибий тузилмаларида коррупция фактлари тўғрисида виждонан хабар берган ходимлар, агар бу маълумотлар тасдиқланган бўлса, ички ҳужжатларга мувофиқ, рағбатлантирилиши мумкин.

VII. Қайта кўриб чиқиш ва ўзгартиришлар киритиш тартиби

7.1. Ушбу Сиёсат қуйидаги ҳолларда қайта кўриб чиқилиши ва тузатилиши керак:

коррупцияга қарши курашиш амалдаги сиёсат ва тартиб-таомилларни қайта кўриб чиқиш заруратини келтириб чиқарадиган ҳолда коррупцияга қарши курашиш соҳасида Ўзбекистон Республикасининг қонунчилиги ўзгарганда;

коррупцияга қарши курашиш самарасиз назорат ва тартиб-таомиллар аниқланганда ва вазирлик таркибий тузилмалари фаолиятида коррупцияни олдини олиш ва унга қарши курашишга қаратилган чора-тадбирларни такомиллаштиришга зарурат туғилганда;

вазирлик таркибий тузилмалари томонидан ўз вазифаларини бажариши хусусиятлари ва бошқалар ўзгарганда.



Ўзбекистон Республикаси
Олий ва ўрта махсус таълим вазирининг
2021 йил “ 5 ” *Май* даги
AdD сонли буйруғига
2-илова

**Ўзбекистон Республикаси Олий ва ўрта махсус таълим вазирлиги
марказий аппарати, ҳузуридаги ташкилотлар, олий ва ўрта махсус,
профessional таълим муассасалари билан ҳуқуқни муҳофаза қилиш
органларининг ўзаро ҳамкорлиги тўғрисида
ТАРТИБ**

Мазкур Тартиб Ўзбекистон Республикаси Олий ва ўрта махсус таълим вазирлиги марказий аппарати, ҳузуридаги ташкилотлар, олий ва ўрта махсус, профессионал таълим муассасалари билан ҳуқуқни муҳофаза қилиш органлари ўртасида соҳага оид белгиланган вазифаларни бажариш жараёнидаги ўзаро ҳамкорлик қилиш тартибини белгилайди.

I. Умумий қоидалар

1.1. Ўзбекистон Республикаси Олий ва ўрта махсус таълим вазирлиги марказий аппарати, ҳузуридаги ташкилотлар, олий ва ўрта махсус, профессионал таълим муассасалари яширин иқтисодиёт ва коррупцияга қарши курашиш борасида белгиланган вазифаларни ҳуқуқни муҳофаза қилиш органлари билан ўзаро ҳамкорликда амалга оширади.

1.2. Мазкур Тартибда қуйидаги асосий тушунчалар қўлланилади:

ҳуқуқни муҳофаза қилиш органлари – Ўзбекистон Республикаси Бош прокуратураси, Давлат хавфсизлик хизмати, Ички ишлар вазирлиги ва бошқалар.

ўзаро ҳамкорлик – Олий ва ўрта махсус таълим вазирлиги марказий аппарати, ҳузуридаги ташкилотлар, олий ва ўрта махсус, профессионал таълим муассасалари билан ҳуқуқни муҳофаза қилиш органларининг ўз ваколатлари доирасидаги ҳамкорлиги;

тезкор-ўрганиш тадбирлари – ўрганишлар, ҳуқуқбузарликларни аниқлаш ҳамда тўпланган ҳужжатларни ошкоралаштириш.

Ўзаро ҳамкорликни амалга оширишда томонлар норматив-ҳуқуқий ҳужжатларда белгиланган ўз ваколатлари доирасида ҳаракат қилади.

1.3. Ўзаро ҳамкорлик қуйидаги шаклларда амалга оширилади:

а) ахборот алмашиш;

б) иқтисодий қонунбузилишлар ва коррупцияга оид қонунчилик талаблари бузилганлиги ҳақидаги маълумотларни чоралар кўриш учун такдим этиш;

в) ҳамкорликдаги тезкор тадбирлар;

г) жиноят ишлари доирасида ўрганишларни амалга ошириш;

д) ҳамкорликда таҳлилий материалларни тайёрлаш.

II. Ахборот алмашиш

2.1. Олий ва ўрта махсус таълим вазирлиги марказий аппарати, хузуридаги ташкилотлар, олий ва ўрта махсус, профессионал таълим муассасалари билан ҳуқуқни муҳофаза қилиш органлари ўртасидаги маълумотлар алманишуви томонларнинг асослантирилган ёзма сўровига кўра амалга оширилади.

2.2. Давлат сирини ташкил этувчи маълумотлар Ўзбекистон Республикасининг “Давлат сирларини сақлаш тўғрисида”ги Қонуни, банк сирини ташкил этувчи маълумотлар “Банк сирини тўғрисида”ги Қонун, солиқ сирини ташкил этувчи маълумотлар Ўзбекистон Республикасининг Солиқ кодекси ва бошқа қонун ҳужжатларида белгиланган тартибда тақдим этилади.

III. Иқтисодий ва коррупцияга оид қонунлик талаблари бузилганлиги ҳақидаги маълумотларни тақдим этиш.

3.1. Олий ва ўрта махсус, профессионал таълим муассасаларида иқтисодий ва коррупцияга оид қонунлик талаблари бузилганлиги ҳақидаги маълумотлар белгиланган тартибда чора кўриш учун таалуклиги бўйича ҳуқуқни муҳофаза қилиш органларига тақдим қилинади.

3.2. Ҳуқуқни муҳофаза қилиш органларига материалларни юборишда куйидаги иловалар тақдим қилиниши лозим:

ўрганишни амалга оширишга асос ҳисобланган фармойиш, буйруқ, иш режаси ва бошқалар;

ўрганишни амалга оширишга асос ҳисобланган ҳужжатлар билан танишиш ёки уларни қабул қилиш рад этилган ҳолларда Ўзбекистон Республикаси қонунларига мувофиқ тегишли тартибда расмийлаштирилган далолатнома;

Ўзбекистон Республикаси қонунчилиги талабларига мувофиқ, расмийлаштирилган ўрганиш далолатномаси, ўрганиш доирасида содир этилган ҳаракатлар бўйича тузилган баённома, ўрганиш давомида олинган материаллар ва бошқа ҳужжатлар;

ўрганиш далолатномаси билан танишувдан ёки уни олишдан бош тортилган ҳолларда ушбу далолатноманинг бир нусхаси почта орқали юборилганлигини тасдиқловчи буюртма хат;

ўрганиш далолатномасида кўрсатилган қонун бузилишлар бўйича ўрганиш субъектининг тушунтириш хатлари ёки ёзма шаклдаги эътирозлари;

аниқланган қонунбузилишлар акс этирилган қисқартирилган хулоса;

субъект томонидан ўрганиш ўтказишга тўсқинлик қилинганда, текшириш ўтказиш учун асос бўлувчи ҳужжатларни олишдан ва тилхат беришдан бош тортилганда тузиладиган далолатнома;

субъектдан мавзули ўрганиш предметига тааллуқли бўлган ҳужжатлардан нусхалар олинганлиги тўғрисида баённома;

ўрганишга жалб қилинган мутахассислар томонидан берилган хулоса;

субъектнинг ўрганиш натижасидан норозилиги тўғрисида ёзма равишда тушунтиришлари ва эътирозлари.

3.3. Ҳуқуқни муҳофаза қилувчи органлар тегишли таълим муассасасидан текшириш тадбирлари билан боғлиқ ҳужжатларни, шу

жумладан бошқа текшириш материалларини расмий суров асосида талаб қилиб олиши мумкин.

3.4. Олий ва ўрта махсус, профессионал таълим муассасалари ҳуқуқни муҳофаза қилувчи органларнинг сўровига асосан аввал юборилган маълумотларни тақдим этади.

Материаллар ҳуқуқни муҳофаза қилувчи органлари раҳбари (ўринбосари)га имзоланган хат асосида юборилади.

3.5. Олий ва ўрта махсус, профессионал таълим муассасалари текшириш далолатномаси келиб тушган санадан бошлаб, қонунда белгиланган муддатлардан кечиктирмай кўриб чиқади ва натижаси бўйича қабул қилинган қарор нусхасини далолатномани юборган органга ўша куннинг ўзида тақдим этади.

Бошқа материаллар бўйича кўрилган чоралар ёки қарор қабул қилинган кундан бошлаб, ўн кун муддатда кўриб чиқиш натижалари ҳақида хабар юборилади.

3.6. Олий ва ўрта махсус, профессионал таълим муассасалари ҳуқуқни муҳофаза қилувчи органлар томонидан юборилган материаллар бўйича назорат чораларини қуйидагиларга асосан рад этиши мумкин:

тақдим этилган материалларда қонунбузилиши тўғрисидаги фактлар мавжуд эмаслиги;

тизим текширувига, ўрганишга тўсқинлик қилувчи ҳолатлар мавжудлиги, шу жумладан ҳуқуқбузарликнинг даъво муддати ўтганлиги.

IV. Ҳамкорликда тезкор-тадбирларини ўтказиш

4.1. Олий ва ўрта махсус таълим вазирлиги марказий аппарати, ҳузуридаги ташкилотлар, олий ва ўрта махсус, профессионал таълим муассасалари ҳамкорликдаги назорат тадбирларини зарурат бўлганда ҳуқуқни муҳофаза қилувчи органлар билан қуйидаги йўналишларда амалга оширадилар:

а) прокуратура органлари ва Коррупцияга қарши курашиш агентлиги билан қонунчиликда белгиланган ҳолларда;

олий ва ўрта махсус, профессионал таълим тизимида яширин иқтисодиёт ва коррупцияга оид ҳуқуқбузарликларни аниқлаш ҳамда тўпланган материалларни ошкоралаштиришда;

б) ички ишлар органлари билан ўрганиш тадбирлари давомида ходимларнинг қонуний фаолиятига тўсқинлик қилинганида ёки уларнинг хизмат вазифаларини бажаришида уларнинг ҳаёти ва соғлиғини муҳофаза қилишда;

в) қонунчиликда белгиланган ҳолатларга мувофиқ бошқа йўналишларда.

4.2. Олий ва ўрта махсус, профессионал таълим муассасалари мазкур бандда кўрсатилмаган йўналишлар бўйича ҳам назорат тадбирларига юқорида кўрсатиб ўтилган органларни жалб этиш учун уларга сўров юбориши мумкин.

4.3. Ўзаро ҳамкорлик ходимлар томонидан ўз ваколатлари доирасида тезкор-ўрганиш тадбирларини ўтказишнинг восита ҳамда усулларини танлашда уларнинг мустақиллигига тўсқинлик қилмайди.

4.4. Ўзаро ҳамкорликда ўтказиладиган тадбирлар бўйича тузилган ўрганиш гуруҳи фаолиятини мувофиқлаштириш ва тадбирлар натижаси бўйича маълумотларни умумлаштириш гуруҳ раҳбари томонидан амалга оширилади.

4.5. Тезкор-ўрганиш тадбирлари Олий ва ўрта махсус таълим вазирлигининг буйруғи ёки ҳуқуқни муҳофаза қилувчи органининг буйруғига асосан ўтказилади.

Олий ва ўрта махсус таълим вазирлиги, ҳузуридаги ташкилотлар, вазирлик тизимидаги олий ва ўрта махсус, профессионал таълим муассасалари ходимлари тезкор-ўрганиш тадбирларига ушбу тадбирларни амалга оширувчи органнинг сўровига асосан жалб этилади.

4.8. Тезкор-ўрганиш тадбирлари натижаларини расмийлаштириш, шунингдек, улар бўйича қарор қабул қилиш мазкур Тартиб, Ўзбекистон Республикаси қонунчилигида назарда тутилган тартибда амалга оширилади.

V боб. Жиноят ишлари бўйича ўрганишларни амалга ошириш

5.1. Жиноят иши доирасида ўрганиш ўтказиш зарурати пайдо бўлган тақдирда ҳуқуқни муҳофаза қилувчи орган ўрганиш мақсади ва муддати ҳамда зарур бўлган ходимлар сони кўрсатилган қарорни Олий ва ўрта махсус таълим вазирлигига юборади.

5.2. Ушбу хатга асосан Олий ва ўрта махсус таълим вазирлиги ходимлари текширувда (тафтишда) иштирок этиш учун сўров юборган органга ўттиз календарь кундан ошмаган муддатга хизмат сафарига юборилади.

VI боб. Ҳамкорликдаги таҳлилий материалларни тайёрлаш ва қўшма мониторинг ўтказиш

6.1. Ҳамкорликдаги таҳлилий материалларни тайёрлаш соҳасида ҳамкорлик тегишли органларнинг ўзаро манфаатларига тааллуқли бўлган масалалар бўйича амалга оширилади.

6.2. Таҳлилий материалларни тайёрлашда ташаббускор томон тегишли органга зарур бўлган маълумотларни тақдим этиш ҳамда ҳамкорликда ишлаш учун тегишли мутахассисларни юбориш ҳақида сўров юборади.

VII. Яқуний қоидалар

7.1. Ушбу Тартиб талаблари бузилишида айбдор бўлган шахслар қонун ҳужжатларида белгиланган тартибда жавобгарликка тортилади.



Ўзбекистон Республикаси
Олий ва ўрта махсус таълим вазирининг
2021 йил “ 5 ” *Май* даги
сонли буйруғига
3-илова

**Ўзбекистон Республикаси Олий ва ўрта махсус таълим вазирлигининг
коррупцион ва бошқа турдаги ҳуқуқбузарликлар бўйича
хабар бериш тартиби тўғрисида
НИЗОМ**

Мазкур Низом Ўзбекистон Республикаси Олий ва ўрта махсус таълим вазирлиги марказий аппарати, вазирлик ҳузуридаги марказлар, Касбий таълимни ривожлантириш ва мувофиқлаштириш ҳудудий бошқармалари, олий ва ўрта махсус, профессионал таълим муассасалари раҳбар-ҳодимлари, профессор-ўқитувчилар орасида ҳамда жамиятда коррупцион ва бошқа қонун бузилишларига қарши курашиш маданияти даражасини ошириш, ҳар қандай ҳуқуқбузарликлар содир этишга қизиқтиришга бўлган уринишларни аниқлаш ва уларга шу ҳақида маълум бўлган фактлар ҳақида хабар бериш, ушбу хабарни рўйхатдан ўтказиш ва ундаги маълумотлар юзасидан хизмат текшируви ўтказиш тартибини белгилайди.

I боб. Умумий қондалар

1. Мазкур Низом талаблари эгаллаб турган лавозими ва бажарадиган вазифа ва функцияларидан қатъи назар Олий ва ўрта махсус таълим вазирлиги марказий аппарати, вазирлик ҳузуридаги марказлар, Касбий таълимни ривожлантириш ва мувофиқлаштириш ҳудудий бошқармалари, олий ва ўрта махсус, профессионал таълим муассасалари билан меҳнат ва фуқаролик муносабатларида бўлган барча ходимларга нисбатан тадбиқ этилади.

2. Олий ва ўрта махсус таълим вазирлиги марказий аппарати, вазирлик ҳузуридаги марказлар, Касбий таълимни ривожлантириш ва мувофиқлаштириш ҳудудий бошқармалари, олий ва ўрта махсус, профессионал таълим муассасалари ходимлари коррупция ва бошқа турдаги ҳуқуқбузарликлар содир этилганлиги бўйича асосли ва ҳаққоний маълумот ва фактларга эга бўлсалар, шунингдек, улар бундай ҳуқуқбузарлик содир этилишига оғдирилсалар, бу ҳақида Олий ва ўрта махсус таълим вазирлиги раҳбарарияти, вазирликнинг коррупцияга қарши курашиш ва “комплаенс назорат” тизимини мувофиқлаштиришга масъул ходимлари ёки ўзлари ишлаётган муассаса раҳбариятига бевосита оғзаки ёки ёзма равишда алоқа каналлари орқали хабар беришлари шарт.

**II боб. Коррупцион ва бошқа турдаги ҳуқуқбузарликлар
тўғрисида хабар бериш тартиби**

3. Коррупцион ва бошқа турдаги ҳуқуқбузарликларга оид хабарлар куйидаги масъуллар ва тузулмалар ҳамда алоқа каналлари орқали берилади:

Олий ва ўрта махсус таълим вазири ва унинг ўринбосарларига оғзаки ҳамда ёзма шаклда;

Олий ва ўрта махсус таълим вазирининг @vazirga_takliflar_bot телеграм боти орқали;

71 246-38-57, 71 207-03-41 телефон рақамлари;

@anticoredu телеграм боти;

вазирлик ва унинг таркибий тузилмаларининг расмий веб-сайтларида жойлаштирилган шакллар орқали ;

вазирлик ва унинг таркибий тузилмаларининг электрон почта манзиллари орқали;

тўғридан-тўғри ҳуқуқни муҳофаза қилиш органларига.

4. Олий ва ўрта махсус таълим вазирлиги ва унинг таркибий тузилмаларига юқорида кўрсатилган алоқа каналлари орқали келиб тушган барча хабарлар Ўзбекистон Республикаси қонун ҳужжатлари ва вазирликнинг ички идоравий ҳужжатларига мувофиқ ҳолисона ва ўз вақтида кўриб чиқилади.

5. Умумий фойдаланишдаги ижтимоий тармоқларда берилган, аноним тарзида берилган, шунингдек ҳуқуқбузарлик содир этаётган шахс ҳақидаги маълумотлар аниқ кўрсатилмаган хабарлар ҳуқуқий аҳамиятга эга бўлмайди ва ушбу маълумотларга тегишли тартибда вазирлик ва таркибий тузилмаларининг ички тартиб қоидалари асосида баҳо берилади.

V боб. Коррупцион ва бошқа турдаги ҳуқуқбузарликлар тўғрисидаги хабарга қўйилган талаблар

6. Ҳуқуқбузарлик тўғрисида берилаётган хабарда қуйидаги маълумотлар акс эттирилиши шарт:

хабар муаллифининг ФИШ, лавозими;

шахснинг мурожаат қилиши учун унга маълум бўлган ҳолатларнинг тавсифи (сана, жой, вақт ва бошқа ҳолатлар);

коррупцион ёки бошқа ҳуқуқбузарлик тури ва ушбу ҳуқуқбузарликни содир этган шахс тўғрисидаги аниқ маълумотлар;

муурожаат қилинган сана;

муурожаатчининг телефон рақами.

7. Муурожаат этувчи ўз муурожаатига асос бўладиган бошқа ҳужжатларни ҳам қўшиб тақдим этиши мумкин.

V боб. Коррупцион ва бошқа турдаги ҳуқуқбузарликлар тўғрисидаги хабарларни расмийлаштириш тартиби

8. Коррупцион ва бошқа турдаги ҳуқуқбузарликлар ҳақидаги хабарлар коррупцион ва бошқа турдаги ҳуқуқбузарликларни қайд этиш дафтарида рўйхатга олинади.

9. Хабарларни қайд этиш дафтари вазирликнинг марказий аппаратида коррупцияга қарши курашиш ва “комплаенс назорат” тизимини мувофиқлаштиришга масъул бўлими ходимлари томонидан, вазирлик ҳузуридаги марказлар, олий таълим муассасалари ва Касбий таълимни ривожлантириш ва мувофиқлаштириш ҳудудий бошқармаларида эса ушбу

фаолиятни мувофиқлаштиришга масъул бўлган ходимлар томонидан юритилади.

10. Хабарларни қайд этиш дафтари варақларига номер қўйилиб вазирлик марказий аппаратида вазир, таркибий тузилмаларида эса муассаса раҳбарлари томонидан имзоланади.

11. Аризачи ёлғон хабар берганлик ҳамда тухмат қилганлик учун белгиланган тартибда жиноий ҳамда маъмурий жавобгарлик мавжудлиги ҳақида огоҳлантирилади.

12. Электрон кўринишда берилган хабарлар ҳам юқоридаги тартибда ёзма ариза мазмуни ва шаклига қўйилган талабларга амал қилинган ҳолда тақдим этилади ва мазкур ариза юзасидан масъул ходимлар аризачи билан мурожаат қилинган кун боғланиб ёлғон хабар берганлик ҳамда тухмат қилганлик учун белгиланган тартибда жиноий ҳамда маъмурий жавобгарлик мавжудлиги ҳақида огоҳлантиради ҳамда дархол электрон кўринишдаги аризани хабарларни қайд этиш” дафтарига ушбу Низомнинг 1-илоvasида белгиланган тартибда расмийлаштиради ва ариза қабул қилинганлиги тўғрисидаги маълумотни аризачига етказди.

13. Хабарлардаги келтирилган маълумотларнинг махфийлиги қафолатланади.

VII боб. Коррупцион ва бошқа турдаги ҳуқуқбузарликлар тўғрисидаги маълумотларни масъулларга етказиш ва хизмат текшируви ўтказиш тартиби ҳамда муддатлари

14. Ҳуқуқбузарликлар тўғрисидаги хабарлар масъул ходимлар томонидан вазирлик марказий аппаратида вазирга, вазирликнинг таркибий тузилмаларида муассасалар раҳбарларига зудлик билан маълум қилинади.

15. Хабарлар тегишли тартибда кўриб чиқилганидан кейин натижасига кўра қуйидаги қарорлардан бири қабул қилинади:

агар мазкур масала юзасидан аввал ҳам мурожаат келиб тушган бўлиб ушбу мурожаатдаги ҳолатлар ўз тасдиғини топмаган бўлса, аризани рад этиш тўғрисида;

хабар юзасидан хизмат текшируви ўтказиш тўғрисида;

хабарлардаги ҳуқуқбузарликлар ҳолатидан келиб чиқиб ҳуқуқни муҳофаза қилиш органларига тақдим этиш тўғрисида;

16. Олий ва ўрта махсус таълим вазири, ҳузуридаги марказлар, таркибий тузилма раҳбарларининг топшириғига кўра хизмат текшируви ўтказилади.

17. Хизмат текшируви натижаси ҳуқуқбузарлик содир этилганлиги факти аниқланганда тегишли муассаса раҳбарига икки иш куни ичида бу ҳақида хабар берилади.

18. Хизмат текшируви амалга оширилиши жараёнида хизмат текширувини ўтказётган ходимлар қуйидаги ҳуқуқларга эга:

ҳуқуқбузарлик тўғрисида хабар берган, ходим, талаба, ўқувчи ва бошқа алоқадор шахслар билан суҳбат ўтказиш;

ходим, талаба, ўқувчи ва бошқа алоқадор шахслар томонидан юборилган хабарлар юзасидан тақдим этилган маълумотларни ўрганиш улар юзасидан тушунтиришлар олиш ва бошқалар.

19. Ариза келиб тушган кундан эътиборан ўн беш кун ичида, қўшимча ўрганиш талаб этилганда бир ой муддатда кўриб чиқилади.

20. Хизмат текшируви натижалари юзасидан ёзма хулоса тайёрланиб унда қуйидагилар кўрсатилади:

тақдим этилган маълумотлар юзасидан ўрганиш натижалари;

мурожаатни тасдиқловчи ёки рад этувчи асослар;

мурожаат юзасидан кўрилган таъсир чоралари;

мурожаат юзасидан аниқланган сабаб ва шароитлар юзасидан амалга ошириладиган аниқ чора-тадбирлар.

21. Хабарларни кўриб чиқиш натижалари бўйича аризачига жавоб хати юборилади.

VI боб. Яқунловчи қоидалар

22. Мазкур Низомга қонунчиликда белгиланган тартибда ўзгартириш ва қўшимчалар киритилиши мумкин.

Ўзбекистон Республикаси Олий ва
ўрта махсус таълим вазирлигининг
коррупцион ва бошқа турдаги
ҳуқуқбузарликлар бўйича хабардор
қилиш тартиби тўғрисида
Низомга илова

**КОРРУПЦИОН ВА БОШҚА ҲУҚУҚБУЗАРЛИКЛАР ТЎҒРИСИДАГИ ХАБАРЛАРНИ ҚАЙД ЭТИШ
ДАФТАРИ**

№	Аризачи Ф.И.Ш	Аризани қисқача мазмуни	Аризани қабул қилган масъул шахс Ф.И.Ш ва ловозими	Ёлғон хабар берганлик ҳамда тухмат қилганлик учун жавобгарлик мавжудлиги хақида огоҳлантирилганлиги	Ариза қабул қилинган сана	Аризачига ариза қабул қилинганлиги тўғрисидаги ариза нусхасини берилганлиги